

四庫全書

史部

欽定四庫全書

史部
硃批諭旨卷十下

臣永瑢恭校

編修臣張謙覆勘

總校官中書臣朱鈐

校對官庶吉士臣張九鐔

謄錄舉人臣楊鸞

欽定四庫全書

硃批諭旨卷十下

硃批李維鈞奏摺

雍正二年六月十二日直隸巡撫臣李維鈞謹

奏為保留良吏恭請

聖裁事竊順德府邢臺縣知縣戴天球自蒞任以來廉
以服官儉以持已催科撫字折獄勸農皆以實心
而行實政且濬渠灌地已及千頃臣現在令其再

大奇大奇戴天球乃一昏愚無知之人朕當日在雍邸時因其粗蠢以之為笑具於登極後不記出仕何地每

十四日報丁母憂除另疏

題報外但念該縣令勤慎廉明實屬循良之吏聽其離任深為可惜臣仰體

皇上察吏安民至意謹繕摺瀆請可否

准令在任守制恭候

聖裁倘蒙

允臣所請俾要地得留賢員庶於吏治民生均有裨益

仰祈

睿鑒謹

奏

朕覽奏不禁大笑驚訝人之不可限量有如是乎若果係真實奮勉學做好官具本題留可也

同日又

奏為奏

聞事竊邪教潛滋愚民易惑臣欽奉

硃批諭旨遵即於南四府地方飭令道府加意密訪今據順德府知府曾逢聖密訪邢臺縣之中巖寨有劉大師傅等倡名順天教聚衆講法煽惑鄉愚當移行通判胡開京等密拏大會首劉言基即劉大師傅到案供出羽黨要國卿等并山主馬征等復經密拏審訊明白呈報到臣臣細閱各供查此教始於劉言基之曾祖劉才運與要國卿等之祖昔年同入中巖寨託稱修行持齋起會倡為順天教

名色沿及言基仍為大會首幻稱真空老祖金公
無生佛母黃婆塑像供奉每年三十兩月聚衆燒
香斂取銀錢書符消災誑誘愚民雖非白蓮教之
遺派實係邪教男婦混雜有壞風俗自應按律嚴
治以罪但劉言基等皆係鄉農因祖代相繼恬不
為怪其志蓋在圖取香錢以為衣食之資故久假
不歸今各知悔悟情願改邪歸正似可從寬分別
枷責開其自新之路應否如是臣未敢擅便理合

奏

既非創起邪教理應如是完結結後不時察訪果實心聞恭候

改悔則已倘若執迷復循故轍再加以重懲未為晚也聖裁其中嚴寨祠宇及附近中嚴寨之太子嚴亦有廟

不累

及無辜最為善政
宇為劉言基等所管今俱已拆燬起獲符像亦盡焚棄以絕根株並未株連一人至山林空僻地方

復嚴飭守備千把等弁盡心稽查勿使匪類潛藏

蝗蝻

再知府曾逢聖才具素優閑濬水利灌田三千餘頃滅盡與否未經奏明朕尚懸懸在念當速為奏聞頃各處蝻子生發督捕盡絕毫不為害今劉言基

等邪教首先訪實拏獲解散尤為強幹之才洵係

賢良之吏

臣謹一併奏

聞伏祈

睿鑒謹

奏

曾逢聖聲名好如緊要處遇有應陞缺出具本題奏

同日又

奏為奏

聞事雍正二年六月十二日據通永道高鑛呈報通州武清縣二處運河橋土各工原係侍郎臣牛鈕領帑辦修與地方官一無相涉但今大雨時行河水驟長武清縣屬運河東西兩岸河西務棋子淀等處俱各漫開皆因向修堤岸類多單薄虛鬆朽裂拆陷所致理合報明等因到臣查運道關係重大臣一面飛飭高鑛親赴驗看各堤衝決若干丈尺有無損壞村莊田禾俟查覆到日另摺具

奏所有武清縣運河堤岸衝漫情由理合先行奏

聞伏祈

睿鑒謹

奏

牛鈕所修工程朕謂斷不至如高鑛所報之甚伊受恩
深重諒非木石何忍如此負朕今歲雨水原係異常之
大所以致有衝決但伊秉性生平與人不睦每每招尤
惹怨而旗人憾伊者更多因此堤岸衝決欲乘機以傾

陷之耳爾於人言不可深信其為人猶屬直率頗稱歷練加之訓教尚可委用非棄材也

同日又

奏為奏明事竊照永定河堤岸關係綦重蒙

皇上發帑培修

遣員巡查誠防護水汛永衛民生之至計也身其事者

自當仰體

聖心潔已辦公以上副

任使下濟工程今永定河權移勢分分司蘇敏事事掣

木爾

泰原因爾保奏留工今既於事無益掣回可也但

時且木爾泰巡查一次輒費三四百金今年已到

不知

蘇敏辦事能否若何耳

工五次其費俱出河工錢糧之內再河工舊例由

銀糧

分司同知公佑工料發銀與管工各官分修如有

金出

汕刷衝決令其賠修今郭家務以下兩岸堤工用

錢糧

六萬七千五百餘兩並不分發各官盡用侍

古人

云聰言當以理察也

上方

郎臣牛鈕河西務夫頭領銀辦理運土一方止給

銀五分七分不等管工各員既無承辦之責將來

錄入已密訪確實奏聞

或有不虞飭令賠修似屬冤抑河工重大臣竊憂

朕如此信任委用於爾一切秉公執正何事不可言何

之不敢不言亦不敢盡言急切繕摺

嫌而不盡言耶

奏明伏祈

皇上睿鑒謹

奏

覽

雍正二年六月二十二日直隸巡撫臣李維鈞謹

奏為奏覆事竊臣查武清縣屬之河西務等處運河

兩岸據通水道高鑛呈報衝漫甚多臣念漕運重

大而村莊田禾又關民命身任封疆何敢不據報

奏

聞而

即有嫌隙

汝亦豈肯因私廢公朕信得及汝

與兵部侍郎牛鈕初無嫌隙也

臣

於去年會同

牛鈕查看永定河堤岸時伊子木爾泰亦相酌議

因彼有巡查之責一切工料若不令其會估則日

後巡查不無異議是以繕摺

奏請令木爾泰會同分司蘇敏料估在臣之愚衷原

冀其同心協力固堤岸而省錢糧也至荷

硃批錢糧既不分發巡察一次三四百金出自何處臣

捧讀至此仰見

朕於政務從來不憚細密非過為搜求也

皇上睿照靡遺此言原出河員之口臣未曾審詳詰詢

實為愚昧今當逐細確查并將節省為公入己之處密訪明白另摺奏

聞再邢臺丁憂知縣戴天球邢邑賑濟得法民頗得所
范弘猷陞任時向臣力薦今知府曾逢聖亦極嘉

獎近因丁憂復據守道桑成鼎詳請

題留臣亦廉訪其政聲頗好故不揣冒昧瀆

奏初不知其為

皇上藩邸舊人臣再當採其政蹟確實遵

旨具本

題留再永定河石堤蟄陷並未開口民田廬舍毫無
傷損直屬順天府之豐潤縣永平府之灤州保定
府之清苑等五州縣河間府之故城縣正定府之

冀州等四州縣順德府之邢臺等七縣廣平府之
永年等七縣大名府之元城等四縣俱報有蝗蝻
雖隨報撲滅全不為害然臣恐地氣蒸濕或有餘
孽或有飛蝗嚴飭文武官弁不時竭力巡查大約
過六月便可保其不復生發五月以後每隔旬日
即得時雨田禾茂盛合併奏

聞謹

奏

田禾茂盛大慰朕懷聞蝗蝻又有新發者亟宜嚴飭地方官務令滅盡而後已

雍正二年六月二十三日直隸巡撫

臣

李維鈞謹

奏為奏明事竊吏治固重廉潔然有守無才則治理無

術事多叢脞

臣

凡於屬員不敢求備然必期其入地

相宜以免貽誤如河間府之吳橋縣知縣常三樂據

知府浦文焯稟稱吳邑頗為衝要有修防催漕之責

常三樂操守尚好但懦弱不振難膺民社之寄請

題調補守道桑成鼎亦稟稱常三樂懦不任事臣以
操守未濫不叅其廢職而以教職

題請補用部議內稱常三樂係引

見奉

旨補授之員並未令巡撫試看等語伏念選補各官皆蒙引
見補授若必奉

旨試看而後可以察叅則非試看之員即不可以糾彈乎部臣
又以生性懦弱必有廢弛實跡駁臣並未開款查列款糾

叅必應提審擬罪而懦弱非有罪之員矧常三樂係
題請調補尤非叅劾可比何庸列款至

大計以廉為首部臣之議誠是但非一廉即可以膺卓

薦必有才以濟之而後堪膺民社之任在常三樂操守廉

潔臣不敢掩其所長而才具平庸臣亦何敢隱其所短今

吏部所議似屬有意搜駁臣不揣冒昧謹具摺

奏明伏祈

睿鑒謹

奏

似此披誠分割絲毫無隱朕實嘉之朕閱部本時曾經再三斟酌因汝原題內有操守好一句部議若但取才而不取守恐人皆不尚廉潔所駁得理朕故依議前有刑部一事吏部此議不過作一不阿從朕意之舉朕若再為正之恐庭臣謂朕有意袒護汝也此事亦甚易處常三樂如果罷軟汝但據實參奏於本內聲明前因伊原無貪蹟所以題請改補教職今奉部駁查常三樂居官罷軟殊屬溺職相應參革如此具題

庶不貽悞地方亦不失爾寬貸屬員之意也

雍正二年七月初四日直隸巡撫臣李維鈞謹

奏為奏明事竊臣欽遵面奉

聖諭試看得保定府知府葛斗南品行實好而才非肆

應誠如

聖明洞鑒然勵志服官克自振拔且秉性和平全不執
果能如是朕為卿慶得臂指之用矣觀伊頗且正氣當
加勸勉每加勸勉教導俱能奉行共矢公忠彼此相
信故保定雖稱劇郡亦可無誤治理也直隸今歲

朕之

秋收大有從來所未見將來南四府收成查詢土人僉云有十分以外北五府收成亦有八九分不等

欣幸

實難形之於筆墨

雖近河之處間被淹損亦屬無多臣

甚好

已現在委查

賑恤自各得所再臣

前奏團練之法因值農忙各勤

力作無地之民傭工餉口臣

故緩而未行今盜風漸息

秋收之後督築圍牆以為永遠之計則鄉兵似亦未

朕亦聞之隨已

降諭

訓飭

矣爾其再加諄切教導

守

為要務也至於口北道范弘德持已頗廉但性情稍乖與同城之總兵知府甚不和協公事難辦臣今細

為開導曲為訓飭倘能知改猶屬賢員臣謹繕摺

奏明伏祈

皇上睿鑒謹

奏

覽

雍正二年七月十六日直隸巡撫臣李維鈞謹

奏為奏明事竊查驛站夫役馬匹二項應增應減之處

准部咨行妥議臣查直隸為萬國會歸之區所設驛

站差使絡繹較之他省衝繁實甚夫役萬不可減而馬匹亦祇可少為調劑也如夫役一項自應如九卿所議照額募足但平時工食盡給與額設之夫一旦大差疊至額夫不敷應用臣酌將額設之夫每於十名內常時募足八名扣留二名工食每日所積便足大差催募之資庶錢糧不致侵冒夫不累而差不誤水驛亦令比照此例至於馬匹臣愚以為減正驛有用之夫馬不若裁僻遞無用之夫馬直屬九十三遞除正定縣一遞歸入正驛青縣

南皮二遞久廢外見存九十遞其損轎抄牌跟馬等夫及接遞皂隸共約二千二百餘名此項夫役有名無人所當盡數裁汰每年可節省銀一萬五千兩再各遞接送公文遞馬共一千四百八十一匹馬夫五百五十名今酌於每遞留馬十匹共留馬九百匹共留馬夫四百五十名裁去馬五百八十一匹馬夫一百名實節省銀一萬四千六百餘兩合計裁汰僻遞夫馬二項每年共可節省銀三萬兩既可省錢糧之糜費又

無虞驛站之廢弛臣謹抒末議已經分案

題覆是否允協理合繕摺

奏明伏祈

睿鑒謹

奏

此事須待各省到齊發該部詳議具覆朕再加斟酌然後可定

同日又

奏為要缺需人謹舉所知仰祈

聖裁簡用事竊照大名府接壤兩省賦繁事劇知府一

官必得才品優長之員方克勝任臣於通省道府

中細加採擇所可深信者惟河間知府浦文焯順

德知府曾逢聖永平知府趙國麟此三員久在

大名府一缺已將范弘猷調用其口北道之缺將錦州

聖明洞鑒之中其才品之優臣不敢瀆陳仰懇

府知府李大綬補授矣朕前歲有奉天之行因知李大

皇上於此三員內

綬之優故爾擢用也

簡調一員補授大名知府於地方大有裨益兼同城之

大名道陳志源今亦因病乞休俟查驗到日即應
題請查大名道統轄三郡缺難久懸並祈

皇上預於三員內

聞趙國麟甚好大名道缺出以之補用允屬相宜
欽點一員則要缺得人而臣亦收臂指之效矣此三員

內得蒙

聖恩允臣所請調補所遺員缺查有順德府通判胡開
京歷任年久服官勤慎實有肆應之才又保定府
理事同知齊式老成練達辦事勤敏若於此二員

內

將胡開京送部引見永平府缺候朕於齊式胡開京二

簡用補授自必殫心供職以期上報

人中斟酌一員補用

天恩謹具摺密

奏伏祈

聖明批示遵行謹

奏

覽

雍正二年八月初六日直隸巡撫臣李維鈞謹

奏為恭請

聖裁事竊山西布政使高成齡摺

奏火耗一事

臣於邸抄中閱九卿議覆伏讀

上諭提解火耗原一時權宜之計將來虧空清理府庫
充裕有司皆知自好則提解自不必行火耗亦可
漸減矣此誠

皇上籌國是軫民依明體達用上下公私之間俱得善
全各省督撫所當遵行之良法也查直屬共虧缺

銀四十一萬三千餘兩臣亟圖彌補於通省耗羨
量留道府州縣養廉之資以其所餘期於二年內
完補清楚臣於雍正元年九月通行起至今年六
月核算完補已有二十萬兩其未完補銀二十一
萬三千餘兩計於雍正三年奏銷時可以清完俟
清完之後則火耗似宜免提然臣更有請者從前
之虧空雖完不能保後此之必無虧空必預籌彌
補之法庶

國帑不致虛懸

臣

查直省火耗較他省為最輕而順

天永平宣化三府錢糧火耗尤為輕減應槩免其

提解保定正定河間順德廣平大名趙州深州冀

聞定

州牧何瑞瀾官聲人品俱甚不堪爾等因其拖欠

州晉州定州以上六府五直隸州所屬錢糧凡係

官庫

銀兩暫為姑容彼向日誑騙府中之銀不思清完

五千兩以下者耗羨無幾應免其提解留為地方

今反

借此為護身之符情屬可惡況居官無狀詎可容

官養廉之資外通計六府五直隸州所屬額徵糧

留亟

當嚴叅將其宦資家產追還逋欠

銀二百一十九萬六千三百二十兩有奇其耗銀

共計二十三萬二百七十一兩有奇內將耗銀六

萬兩留貯道庫以補無著虧空則帑項可免虛懸
矣再將五萬兩存貯道庫以備修理城堤補葺營
房整頓營伍及種種隨時之公費一皆取之自上
則公捐之累自絕矣將二萬兩為道府各廳養廉
之資順天永平宣化三府火耗既不提解霸昌通
永口北三道永宣二府廳州縣聽其沿舊無庸議
給守道巡道天津道均可養廉亦無庸酌給惟大
名道及保河正順廣大六府每員應各給銀二千

兩同知通判計共十二員每員應各給銀五百兩
節儉敷用則需索之弊可杜矣所餘耗銀七萬二
百七十一兩有奇給與六府五州屬之九十二州
縣衛分大中小三等大者給以一千二百兩中者
給以千兩小者給以八百兩上司之餽遺既絕通
省之公費有資上下各有養廉之項則虧空之患
可以永除矣至留補虧空及通省公費每年逐案
造冊恭呈

睿鑒則燭照數計不能隱匿絲毫似可永久通行者也

臣謹酌議陳請可否如是伏祈

聖訓指示遵行謹

奏

爾職為一省之綱領凡地方上此等事總在爾酌量料理合宜朕有何不見信之處耶

雍正二年八月初八日直隸巡撫臣李維鈞謹

奏為恭報微臣公出日期事竊臣標屬協營臣擬於

暇時親往考驗久經

奏明今吏務少清而各營伍生兵虛兵之弊恐未盡

絕

臣

擬於八月初八日自保起程赴正順廣大等

處協營查驗所有微

臣

起程日期理合陳明謹

奏

知道了保舉武弁一摺留中報秋成分數一摺另有旨諭部真可慶喜之事也

雍正二年九月初一日直隸巡撫

臣李維鈞謹

奏為奏

聞事竊

臣

往南府各協營查驗馬步兵丁惟忠順營之

虛冒為尤甚查守備李仲銀係

臣

前以技勇保薦

蒙

恩特放之員不思報効廢弛營伍

臣

不敢以向經保薦

少有徇隱現在繕疏

題叅並將

臣

誤薦之咎請

此等之咎正見不徇隱處

勅部議處至一路墩臺營房俱修整堅固其守汛之兵

應撥馬兵二名步兵三名但營內馬兵有不敷分

撥者則撥步兵以補其數

好

大路兩傍所栽柳樹正

栽種

樹木難

必其盡數生發一載之間即生發十之三

定府以北生發者十之六七正定府以南生發者

四已

頗有可觀矣

僅十之三四已飭地方官勸民於明春即行補插

再九月望後方為農隙當飭地方官督率鄉民修

築圍牆須得兩年始有成效抑

是

臣思巡撫二字專

雖約

畧定期臨時再當斟酌不必拘泥

以巡察撫綏為事

臣

擬於每年三月九月巡查通

省民生營伍實有裨益

臣

出行從不用地方車馬

雖然

地方大吏舉動不宜輕忽切諭

此番往返二十日僅費百金而已定州知州何瑞

瀾即日嚴叅合先一併

奏覆伏祈

睿鑒謹

奏

覽

雍正二年九月初九日直隸巡撫臣李維鈞謹

奏為特舉賢員仰祈

睿鑒事竊惟潔已奉公竭忠効力原屬臣子之常分但才守兼優者未易多得查巡道常德壽自履任以來勤於辦事自甘淡薄實為才守兼優之員臣何敢隱匿謹具摺奏

聞仰祈

睿裁簡用惟是直隸巡道一官為通省刑名總匯又兼管驛務最為繁劇臣方藉常德壽為臂指之使倘荷

聖恩擢任加以陞銜食俸仍留原任陞轉非惟常德壽
感激無地並勵公忠而臣亦可得臂指之用臣為
賢才起見非敢徇私妄保伏祈

皇上睿鑒謹

奏

常德壽原好朕所稔悉因直隸巡道之任甚屬緊要所
以留伊供職不然早另用於他處矣爾此奏與朕意甚
合隨另有諭旨也

雍正二年九月十九日直隸巡撫臣李維鈞謹

奏為奏覆事竊查今年直屬秋收大有比戶盈寧惟
順天府屬之霸州大城東安武清寶坻玉田梁城
等七州縣所夏秋雨大田禾淹損仰蒙

皇上念切民依

勅諭臣將倉糧酌量施恩賑濟毋使生民失所欽此轉
行欽遵萬姓歡呼莫不感頌

如天之仁查據守道桑成鼎勘明霸州等七州縣所被

水之處既荷

殊恩賑濟已無艱食之虞但本年錢糧心切急公力有未紓倘蒙格外

弘仁將雍正二年應徵錢糧緩至雍正三年麥收後帶徵則有加無已之

殊恩萬民之感戴尤無紀極矣但應否緩徵出自

特恩臣謹據愚忱伏祈

睿鑒謹

奏

七州縣所既經被淹餬口尚且艱難未有一面賑濟又一面催徵之理當援賑恤之旨題請緩徵可也

同日又

奏為奏

聞事竊天津關額稅之外所有贏餘銀兩特荷

聖恩悉行裁去如有贏餘令臣據實奏

聞欽遵在案臣查鹽法道段如蕙於一年期內代理二

季零二十六日任內未經奉裁計日核算應解贏
餘銀二萬兩有奇據如蕙止報有六千二百餘兩
尚少一萬三千七百餘兩雖據稱冬季河凍貨阻
致有缺少然不應虧缺如許之甚臣恐其徵多報
少現在嚴駁查叅嗣改委通水道高鑛接管在一
年期內代理一季零六十四日若循舊例核算該
有贏餘銀一萬四千九百七十餘兩今據報有一
萬七千三十兩有奇較之舊額多銀二千六十餘

兩內除十日內額定贏餘銀九百七十二兩有奇
係在未奉裁之先飭令仍照例解部外實存贏餘
銀一萬六千五十八兩應否徑解

內庫抑令解貯道庫撥發天津建倉之用伏祈

聖裁批示遵行再據高鑪稟稱今年夏秋河水深通商
船湊泊故贏餘較多臣查天津關贏餘銀兩歲有
盈絀難以額定總照每歲徵收實數悉行報解至
於高鑪所管二季錢糧亦能潔已奉公矢志不欺

理合奏

聞仰祈

睿鑒謹

奏

贏餘銀兩照例送部前旨甚明高鑛殊多此一稟若仍按額定之數較量多寡則與裁去之旨復相左矣果能連年奉行盡善朕自然加恩議敘此乃有賞無罰之事但令伊據實無欺即為盡職也

雍正二年九月二十八日直隸巡撫臣李維鈞謹
奏為奏明事竊查玉田縣之還鄉河於康熙四十二
年間衝決被淹民田四千三十一頃旗地千有餘
頃臣仰體

皇上軫恤民瘼至意備發銀兩委武清縣知縣陳良襄
玉田縣典史李文標修築並不廢民一錢勞民一
力據報稱自運河頭起至牛見莊止共計六十二
里有奇寬十一丈至三四丈不等挑挖淤沙疏濬

深濶兩岸堤埝培高添厚其莊前決口建月牙大堤一座堤前臨水又築滾水壩一座莊南決口亦俱下椿堵築堅固水歸故道暢流入海舊淹旗民之地已盡數涸出今工程告竣繪圖呈送到臣臣念還鄉河兩岸地土有淹有涸今河濬堤築自後地盡可耕糧皆有著臣節省辦理價半工倍若循例料估動用帑項必至萬金矣所有還鄉河修濬工竣并確核繪圖恭呈

欽定四庫全書



石北詩集

卷十下

御覽伏祈

皇上睿鑒謹

奏

修濬還鄉河計日成功甚屬可嘉該撫並委員陳良襄等朕已諭部議敘矣

雍正二年十月初一日直隸巡撫臣李維鈞謹

奏為奏

聞事竊查直屬地方自秋收之後徧播麥種已漸次生

發今於九月二十八日之晚至二十九日夜以繼
日普降甘霖訪之農民咸相慶幸預卜麥秋定獲
大有若冬深得雪必得十分收成理合奏

聞恭慰

聖懷謹

奏

明歲收成原賴今冬雨雪然為期尚早朕何可預為希
冀也惟我君臣敬持今歲無逸之念不敢荒寧料

上蒼必仍賜與今年之瑞應也願與卿共勉之

雍正二年十月十四日直隸巡撫臣李維鈞謹

奏為奏明事竊天津建倉臣委河間府知府浦文焯

木植價貴從未有如今年者

赴道庫領銀備料興工因津通二處木少價貴委

員前往永平府採買關口留阻運送稽遲至六月

七月始陸續運至工所即飛飭浦文焯嚴督監造

今據呈報建造倉廩照通倉之式共應建連三廩

十六座因木植到遲惟恐留漕有誤併力僱工先

建十二座於十月十二日工竣已可貯米五十萬石尚應建四座木瓦甃灰悉已備齊但天寒將凍

應俟春融建造工竣另

此

舉好將來甚有並處

奏再修築太行堤工原估銀一十三萬八千三百餘

節省

如許可謂真能實心任事也

兩臣嚴飭督修各官實心辦事工竣核算實用銀九萬六千八百餘兩節省銀四萬一千五百餘兩

臣已同河臣齊蘇勒會疏

題報在案矣臣稽之往昔伊尹耕莘之時有區田之

法收穫倍徙臣繪成區制在保定城內賃地二畝
僱人試行之其播種灌溉尚未如法而二畝之地
已收穀十六石若無地窮民得荒廢之地數畝俾
其區種則數口之家即能養贍或歲遇旱澇仿而
行之於農功大有裨益臣一併奏

聞伏祈

睿鑒謹

奏

區田一說向日視為迂濶之談亦未聞有行之者觀爾
所奏收穫倍蓰則非荒唐矣此法倘能通行獲益良匪
淺鮮雖係古人成法亦爾一片為國為民之心感格神
明之所默授朕實欣悅之至俟後再有成效更為源源
奏聞此誠美政也

雍正二年十一月十三日直隸總督臣李維鈞謹
奏為遵

旨奏覆事竊臣面奉

諭旨宋師曾虧空完日令臣一面具題一面摺奏欽此

臣查商欠虧空一案宋師曾名下應追賠補不足銀四萬七千四百九十三兩有奇勒限三年清完今據宋師曾於一年限內陸續交還守道鹽法道庫貯訖除俟守道彙成鼎鹽法道段如蕙將所交銀兩彙查詳覆另疏

題報外所有宋師曾名下應追銀兩於一年限內照數清完緣由臣謹繕摺先行奏

聞謹

奏

賠補銀兩既經清完具題可也

為宋師曾乞恩係爾之意見抑或出於年羹堯之意見
若係爾意朕即施恩若出於年羹堯之意朕則不施此
恩也近日年羹堯陳奏數事朕甚疑其居心不純大有
舞智弄巧潛蓄攬權之意爾之獲蒙知遇特由於朕之
賞識拔擢自初次召對時見爾藹然有愛君之心見諸

詞色所以用爾自用之後爾能盡心竭力為國為民毫不瞻顧因而遂取重於朕斯豈年羹堯所能為政耶我君臣之間若有一物間隔二人皆減價矣年羹堯既不能於李紱田文鏡諾岷等為禍又焉能於爾作福近有人奏爾餽送年羹堯禮物過厚又覓二女子相贈之說朕實不信想斷無此事但念卿事朕如此忠誠與朕如此契合朕凡有言何忍隱而不宣至卿向日與年羹堯之交往曾經奉有諭旨朕亦不怪今年羹堯既見疑於

朕故明白諭卿以便與之疎淡宜漸漸遠之不必令伊
知覺年羹堯奏稱俞兆晟在京招搖多事頗不利於卿
云云此一節自當面諭俞兆晟轉以諭卿總之朕之待
卿一字不瞞卿亦當惟命是從赤心奉戴為是諸王大
臣中秉公為國家愛惜人材者惟怡親王一人卿倘有
不便達朕瑣屑之隱情怡親王儘能照拂並可為卿周
全卿何不樂為此不擔干係之坦途耶大笑書此特諭
雍正二年十一月二十二日直隸總督臣李維鈞

謹

奏為密奏事竊蒙

皇上批回摺子

臣

恭捧跪讀不禁感極涕零

臣荷

聖諭敢不瀝陳微悃

臣前

陛見時在

乾清門年羹堯傳

旨宋師曾虧空清完即具摺來欽此

臣旋蒙

召見當即面奏隨荷

上諭宋師曾虧空完日一面具題一面摺奏欽此臣於

回署後據報全完是以繕摺先行奏

聞然所交銀兩須俟守道鹽法道彙查詳覆方可具

題臣已於摺內聲明至臣身受逾格

弘恩已出分外更何敢為他人懇求今蒙

硃批臣錯會朕意矣若係卿意朕必開恩何惶悚之有

益惶悚靡寧矣伏念臣一介孤踪蒙

皇上簡任巡撫今又

特授總督加銜兵部尚書

賜祭賜廕榮寵非常內外臣工未有如臣之受

恩深重若以年羹堯之薦或蒙

晉臣一階斷無有如此相遇之隆者臣知之甚明實

未曾感恩於私室也十月內年羹堯過保定問臣

有何舊蹟隨將所有法書三冊畫幅四軸送看彼

即取去三件亦非臣有心餽遺此外實無他物臣

蒙

皇上恩榮已至更何所求更何所畏且心頗向上何肯

朕前諭

即謂斷無之事不過出於小人毀謗之口耳

覓二女子餽送作此醜行為世笑罵也臣數次入

朝所見諸王大臣實惟怡親王公忠為

國愛惜人材見臣孤立極加知愛然臣未敢親近逮

荷

恩諭往來共輸赤心互相敬重亦從未私結恩好以圖

倚仗而於他人更可知矣臣於初五日面

奏臣之居官為人

卿之心行何待朕再看也

皇上再看臣二三年則臣之心跡品行可見今蒙

思遇愛護至於此極若懷有二心則犬豕不如將臣罪
暴之天下亦覺尚有餘辜矣臣之私心惟願大小

臣子一心事

主倘心有不純雖素相交往亦必嚴絕矧蒙

特諭令臣漸漸遠之臣

自祇

導

並

不敢

一字洩露

但奉

知

理當如是卿之慎密朕所悉

但奉

旨

料理地方事宜措之行為同城中有心腹探聽豈能

聽

不妨

終

祕臣

尚有

欸欸愚忱

摺奏難盡於封印後必當

再請

陞見披肝露膽於

聖主之前庶臣之隱情可以少達伏祈

睿鑒謹

奏

朕意大概諭俞兆晟前來傳諭於卿封印後不必來京
朕諭明白剴切卿但知之至於卿所有難盡之忱朕皆
洞悉又何必多此一番形跡耶

雍正二年十二月初六日直隸總督臣李維鈞謹

奏為續報得雪事竊保定郡城於十一月二十八日得有瑞雪緣由經臣具摺奏

聞今據各屬陸續呈報前來查順天府屬州縣衛十一月二十五六八等日得雪一二三寸不等保河正順廣五府所屬州縣衛十一月二十八日得雪一二三寸不等宣化府屬各州縣十一月二十五日得雪五六寸不等直隸冀趙深晉定五州并所屬各縣十一月二十八日得雪一二寸不等似此瑞

雪普降預兆豐年之慶理合繕摺陳明謹

奏

闔省得雪莫非吾民之幸但慮微少不足以滋潤二麥
朕連日仰瞻雲氣正爾希望未已

雍正二年十二月十一日直隸總督臣李維鈞謹

奏為恭懇

聖恩請留賢員事竊臣叨膺重任惟賴一二屬僚同心
協力以圖報効巡道常德壽才守兼優實資助理

前經具摺保薦懇

恩仍以陞銜留任今常德壽叨沐

特恩陞授江西布政使浦文焯陞補常德壽員缺我
皇上知人善任固將使賢員分佈共襄

至治惟念

畿輔重地尤在得人見今守道桑成鼎亦經陞任所
遺員缺蒙

恩簡用自必賢良之選臣何敢置喙但常德壽任直年

餘事皆熟悉而臣又知之甚深且守巡二道缺已
荷

特旨改陞藩臬兩司衙門員缺相當臣不揣冒昧仰懇
聖恩將常德壽調補直隸布政使則駕輕就熟察核必
清實有裨於吏治民生臣謹具摺

奏懇伏祈

皇上允臣所請臣無任惶悚待

命之至謹

奏

羅密較之常德壽更好雖未經外任其人品操守俱優
且老成持重汝一見即知矣目今須汝推誠提挈逮一
半載間事務練習之後是一超羣出衆之布政司也

雍正三年正月十三日直隸總督臣李維鈞謹

奏為恭報雨雪事竊上年冬雪甚微麥田未潤臣與
各屬員方共殷憂茲於正月十二日申時起至戌
時止普降膏雨入土三寸自亥時起至十三日午

時止復得大雪積地六寸四野均沾萬民歡悅皆

由我

皇上仁慈育物誠敬格

天所以感

穹蒼下沛膏澤豐年之象可以預必理合繕摺先行

奏

聞謹

奏

真為可喜可慶朕惟以手加額感極而彌增敬慎之忱
前於爾陞見時朕曾向爾言看節氣光景正月內必有
應時雨雪矧值

祈穀大典之期膏澤普降更見

上蒼昭示賜禧之象朕仰瞻閭閻畏之心不覺凜然此二
字我君臣共勉之

雍正三年正月十九日直隸總督臣李維鈞謹
奏為奏

聞事竊直屬各處大道為萬國所經由每遇夏伏或天
雨水發窪者成河平者泛溢行人病涉而畎畝亦
被淹害再四籌度莫若於大路左右開溝二條寬
深各一丈以備蓄洩則田土行役均受其利臣擬
於二三兩月間農工之暇撥夫給粟委員督率以
為此舉但今距二三月為時已迫臣雖現在具疏
題明深慮部議稽阻則行有未逮臣抄疏繕摺先行
奏

聞是否可行伏祈

皇上乾斷謹

奏

此事且勿具題朕與在廷數人商酌各議論不一乃利害相半之事況非急務今歲不必舉行俟冬間爾來見朕時面定可否或於近水窪下之處試開數里驗其果否有益似乎猶可第恐新加之土一遇伏雨更致泥濘跋涉維艱亦須預為籌及也

雍正三年正月二十五日直隸總督臣李維鈞謹

奏為續報雨雪事竊保定郡城於正月十二至十三

日得有雨雪經臣奏

聞今續據呈報如順天府屬於正月十二三日涿州保

定得雪七八寸東安得雪五寸餘固安文安永清

武清房山寶坻良鄉得雪二三寸又保定府屬之

雄縣得雪七寸容城安肅得雪六寸祁州慶都定

興唐縣蠡縣深澤博野完縣涞水高陽得雪三四

寸安州易州新城新安滿城得雪五寸又河間府屬之寧津得雪五寸河間青縣東光得雪一二寸靜海任邱得雪四寸又正定府屬之正定行唐直隸晉州深州定州及所屬之新樂得雨雪二三寸直隸趙州及深州屬之饒陽安平晉州屬之無極得雪一二寸又廣平府屬之永年邯鄲曲周雞澤得雪一二寸又宣化府屬得雪一寸其未報到之州縣及永平順德大名三府屬俟報到再行彙

奏外正在繕摺聞保定郡城於本月二十三日又得

細雨入土六寸四鄉透足前於正月十三日值

祈穀大典之期普降雨雪方及一旬於二十三日復得

膏雨五風十雨預兆豐年是皆我

皇上敬

天勤民

盛德之所感召也臣謹具摺奏

聞伏祈

睿鑒謹

奏

初春解凍遂得雨雪如此透足實為罕遇然二麥之收穫究於麥秋後始可定耳

雍正三年二月初一日直隸總督臣李維鈞謹

奏為奏覆事竊查保定府之定興縣知縣梁燦因稽

延年羹堯奏章例應降一級調用臣於正月初二

日進京路由定興沿路居民環稱梁燦勤慎愛民

公額

題留_臣亦素知其稱職是以懇求

皇上將梁燦降一級留任而不知吏部議處已於上年
十二月二十二日奉

旨依議欽遵在案所以臣准部咨不敢再有瀆

奏今接內閣學士臣吳士玉信蒙

皇上令臣將保留之知縣覆奏伏念

皇上日有萬幾宵旰不遑臣所奏保留僅一縣令乃蒙

念及臣奏

特命吳士玉傳問臣謹據實具摺

奏覆伏祈

睿鑒謹

奏

不但縣令之職宰制百里生民所繫理宜鄭重即動靜
食息之間朕未嘗不孜孜以勤慎自勉也

同日又

奏為敬抒愚悃仰祈

聖鑒事竊臣蒙

皇上恩遇信任優渥已極感激彌深報効無地苟知識所及敢不披誠入

告如舅舅隆科多大將軍年羹堯過失多端疊頒上諭固已昭示天下然不即加罪者誠我

皇上恩同覆載布廣大之仁欲使其聞而知悔悔而知改仍保全其始終也但臣恐二人不悟罔知改悔

反生疑畏則難以辦理事務而

君臣上下未免有所間隔以臣愚見將二人之黨以漸而散二人之權以漸而輕則其權勢已去自知循分謹守仍祈

皇上錄其微功

示之以恩時加

賚予既凜

天威更沐

矜全是

皇上之恩威並著而二人之感戴亦因替矣臣不揣冒

昧披瀝愚忱密摺奏

聞是否可採伏祈

睿鑒謹

奏

卿之忠誠朕所素悉前於面奏時朕已明諭矣今復有此奏更見惓忱但朕自有定見不必過慮隆科多年羹

堯之輩豈能逃朕之範圍也

雍正三年二月二十五日直隸總督臣李維鈞謹

奏為奏

聞事竊臣前以大路兩傍開挖深溝具

奏欽奉

硃批仰見

聖慮周詳臣何敢冒昧通行敬遵

聖諭先試行之臣就近在清苑安肅滿城三縣地方親

往察看形勢每遇鄉民詢以路傍開溝僉云若一
開通不獨利於行旅地土可免被水之患臣即面
曉官民次日興工而鄉民趨事不召自至今已開
通數十里每夫一名給米一升錢十五文資其口
食民尤鼓舞今定興慶都二縣亦踵而行之矣竊
計三月十五日以前東作未興可以推廣行之如
有未妥之處即當暫停俟秋收後再為酌行查自
良鄉縣至邯鄲縣計一千二百里自涿州至景州

計六百里合算兩傍里數共三千六百里應給工
食約用米三萬餘石約用銀一萬六七千兩查雍正
二年捐貯社倉穀有五萬餘石伏懇

聖恩將此項穀石動支給發所需之銀容臣在前

奏准公費五萬兩內支用此事臣蓄志十年未得舉
行今蒙

皇上命臣試行不料民情踴躍如此至直隸地形每多
路卑而地高一經大雨官路成河行人甚苦今開

溝新填之土即有泥濘亦無甚礙況目下天氣晴
和見在所填之土已乾燥易行可無上厓

聖慮也臣為地方起見不揣冒昧再行瀆請伏祈
睿鑒俞允臣不勝惶悚兢惕之至謹

奏

開溝非不可待之事如此急遽殊屬悖謬倘有人以干
礙風水之罪議加於汝則朕亦不能為汝寬貸也此事
必通盤將地之高下水之去來明白繪圖審視斟酌而

後可定豈可乘一時高興汲汲皇皇以從事乎至秦中
如有未妥之處即當暫停是何言歟汝甘為貽笑於人
之督撫朕不甘為輕舉妄動之人主也汝於此一事之
固執大誤矣

雍正三年二月三十日直隸總督臣李維鈞謹

奏為微臣負咎實深仰祈

聖慈矜察事竊臣猥以庸愚疊荷

聖恩高厚至極靡加而才識淺陋動多隕越路傍開溝

臣妄以為利冒昧瀆

奏恭奉

硃批跪讀之下惶悚伏地汗浹於背蒙

皇上寬恩即不加以重譴而

開示明晰

訓誨嚴切臣感懼益深尤覺無地自容今遵

諭旨已將開溝之工星行停止矣但臣之輕舉妄作咎

實難辭謹負罪瀝情繕摺具

奏伏祈

皇上睿鑒矜全臣無任惶恐戰慄之至謹

奏

大抵行為不宜過偏貴乎執中即報効之心亦然朕並不謂此事不當行但未洞悉其情形且非不可緩之事何必如此輕率急遽所以有前此之諭今既經停止俟冬間爾來見朕時備悉敷陳可也此時預將沿途地之高下水之去來勘明繪圖進呈朕覽明庶便酌定

雍正三年三月初七日直隸總督臣李維鈞謹

奏為恭謝

天恩事竊臣接鹽臣莽鵠立來書以臣清貧將舊有鹽規與衆商酌議願歲輸銀八千兩與臣養廉已具摺奏奉

旨俞允通知到臣伏念兩年食用皆從前所積之宦資一絲一粟何莫非

天家之膏澤且此項鹽規臣前已

奏明裁革茲重荷

聖慈允鹽臣所請臣何人斯乃蒙

皇上養宏恩至於此極臣感戴日深報稱愈難矣謹

繕摺

奏謝伏祈

睿鑒謹

奏

此係爾應得之項且匿情務名朕最不喜不但此一項

舉凡分內所應得者不妨取之留為公用身為一省總
領賞勞之費亦所必需何庸矯廉與事無濟朕生平所
取惟在適中得當而已

同日又

奏為奏明事竊開溝非不可緩之事而臣輕舉妄作
負咎實深乃蒙

聖慈矜恕

指示諄切臣惟恪遵

諭旨將地之高下水之去來明白繪圖但臣未能徧歷
察看委霸州知州遂選自良鄉縣南至景州自涿
州西至邯鄲縣逐一相度備細繪圖到日恭呈
御覽伏候

聖裁再古北宣化天津三提鎮營伍軍實提鎮諸臣各
有整飭專責但臣蒙

特恩統轄將弁兵目尚未簡閱臣於正月內面覲
天顏曾經奏明於公務之暇次第巡查今臣於三月十

二日由河間天津通州涿州各鎮協逐處考察古
宣二處容臣於秋間徧往巡查至臣往通涿二協
道路所經密邇

京師臣戀

主情深必欲詣

闕請

安恭聆

聖訓則有所遵守可免隕越臣無任依戀待

命之至謹

奏

前陞見未久目下不必來京即通州亦宜俟秋冬之際
一路順便察看爾於冬初巡查至京之日適當朕謁
陵之時方為一舉兩便不然仍分為二事矣辦理地方諸
務亦屬緊要何必僕僕於道路耶

雍正三年三月十五日直隸總督臣李維鈞謹

奏為雨澤及時恭慰

聖懷事竊查直省自正月得過透雨麥田滋潤二月至
今未降雨澤麥已將花秋禾盡種望雨頗殷今臣
於三月十四日路過大成文安霸州靜海等處自
卯時起至申時止得雨三四寸不等詢之鄉民僉
云雨雖不多已可接濕麥可全收秋種亦必茂發
矣且此日同雲四布得雨必廣此皆我

皇上愛民誠切實默感乎

上蒼每值望雨之候甘霖為之立沛也為此謹

奏

暮春時雨潤麥滋禾不啻甘露誠可欣幸朕觀景象此日之雨大槩寬廣北數省必獲均沾膏澤也

雍正三年三月二十五日直隸總督臣李維鈞謹奏為奏覆事竊查文安大城兩縣交界之艾頭莊至灘里村等處被水地方經都統額爾金奏請挑河築堤奉

旨前往查丈之日會同總督勘明詳議具奏欽此戶部

咨行到臣臣欽遵於本年三月十五日會同額爾
金并率同子牙河分司蘇瞻霸昌道卞之銰文安
大城兩縣勘得子牙河堤東有艾頭莊莊前有一
支河長二十餘里濶四五六七丈不等其河南抵
子牙河大堤北通淀河水大之年淀河之水灌入
支河河邊共十九村莊往往被淹臣等會商於艾
頭莊前築一小堰攔截淀水不入支河則可保衛
十九村莊而艾頭莊之百姓又以東北風大則淀

河之水勢直衝艾頭莊若將支河口子堵截則艾頭莊之受害比十九村為更甚臣細觀水勢其言非謬因從支河口汴流而南地名張毘口向有民堰一道高出水面二尺其址猶存係前人修築成規臣等擬於張毘口照舊堰基址築堰一道仍高水面二尺則水小之年十九村可以保守水大之年艾頭莊亦不獨受衝激矣臣謹遵

旨會同勘明詳議具

奏伏候

聖裁謹

奏

爾遵旨親詣會勘仰體朕意自必周詳合宜即照所議
行

同日又

奏為續報雨澤事竊臣於三月十四日在路得雨當
經具摺恭

奏在案今續據各屬呈報前來查東安保定武清易
州新安涿水蔚縣延慶懷來九州縣各得雨三四
寸不等房山清苑安肅正定四縣各得雨三寸昌
平通州涿州良鄉定興深澤雄縣蠡縣新城河間
東光寧津故城定州藁城獲鹿武邑栢鄉延慶十
九州縣衛各得雨一二寸不等又據清苑縣呈報
三月二十日至二十一日得雨二寸再此兩日涿
州易州三河三州縣各得雨三寸通州得雨霑足

定興滿城容城涑水高陽博野唐縣安肅八縣各
得雨二三寸及一二寸不等除未到各屬俟報到

彙

奏外所有續報得雨之州縣衛合再繕摺奏

聞謹

奏

昨於十九日京中得雨是日雲氣濃郁光景雨澤必廣
不料竟未遠被殊為意想之所不到頃聞河南頗覺亢

旱朕甚憂之大約南四府雨亦不甚霑足也

雍正三年四月十七日直隸總督臣李維鈞謹

奏為奏

聞事竊直屬雨澤永平宣化二府屬及京東各州縣俱
已霑足保定河間二府屬雖屢得雨尚屬不敷南
四府雨澤甚少以致上厓

宸衷今大名府屬之南樂內黃開州滑縣東明長垣等
六州縣據報於四月初三日各得雨二三寸不等

正定順德廣平三府屬亦有得微雨者總未霑足
臣日夜兢惕虔誠祈禱十一十二兩日僅得微雨
二次是臣奉職無狀何能感格伏念我

皇上體

天之心勤求民瘼省刑減賦賑濟蠲租

仁恩廣被日致

天庥是以山西河南兩省荷

聖主默禱甘霖立沛臣惟仰賴

皇上德孚

天心福庇生民自必甘霖大沛也臣不勝惶悚感惕之至

謹

奏

去年朕之政事常恐不逮爾之治績今歲爾之治績遠
不逮朕之政事矣所以

上天垂戒昭著此亦顯然可見者也慎之

發來二摺秉公回奏

雍正三年四月二十一日直隸總督臣李維鈞謹

奏為

天恩彌厚臣咎愈深仰祈

睿慈事竊臣蒙

皇上批回摺子臣跪讀之下惶懼失措感激難名伏惟
我

皇上之聖明猶勵精圖治宵旰不遑事無大小盡善盡
美臣下縱竭精神材力豈能仰補於萬一正猶

天之不可階而升也臣以庸愚兩年以來幸免隕越皆荷
聖訓指示今年辦事雖不敢懈弛而識力闇陋多蹈愆

尤乃蒙

皇上不即加以重譴諄諄

訓勉雖

天地之生成父母之顧復無此

慈覆臣惟有益矢忠誠以圖少答

皇恩於萬一再蒙

皇上發來二摺容臣細查確實秉公

奏覆斷不敢曲徇情私伏祈

睿鑒謹

奏

觀爾一切章奏文情口氣甚與年羹堯相仿總緣爾等
字蹟往復稠疊彼此熟習之故耳朕每諭毋務虛詐爾
竟不能領畧猶為此種浮泛套語朕深不取也

雍正三年五月初一日直隸總督臣李維鈞謹

奏為續報雨澤事竊直屬雨澤據各屬呈報前來查
四月十七日香河西寧得雨三寸五分二十三
等日昌平阜平得雨霑足宣化得雨五寸保安順
義懷柔得雨霑足新河唐山栢鄉得雨一二寸宛
平大興得雨五分二十三至二十五日蔚縣得雨
尺許隆平內邱得雨四寸深州得雨霑足臨城邢
臺滄州趙州武邑任縣沙河南和得雨一二寸臣
查各屬得雨透足者已多尚有未透足之處惟保

定河間兩府有數州縣衛雨澤更稀臣見在遵漢
儒董仲舒春秋繁露祈雨之法虔誠祈禱除各屬
再有報到另

奏外理合將得雨地方具摺奏

聞謹

奏

覽奏因檢春秋繁露細閱其祈雨之法朕意似此皆可
不必蓋獲罪於

天無所禱也大凡地方水旱沴不虛生或朕朝政闕遺或爾等封疆大吏治理紕繆或小民習尚澆漓之所致消弭之道當應之以實不應之以文惟反躬修省克己改過然後齋肅籲懇則

天人交感之際潛孚默契有如響之應聲但庸愚視為杳渺無憑耳朕即位以來凡有祈禱從未命僧道之流設壇作法祇令其諷誦經典代達一疏文而已朕嚴恭寅畏敬

天之心無時敢懈至於鬼神之道體物不遺第宜敬而遠之固不可輕忽亦不可溺信而涉於謠瀆茲亟應省察吏治檢點刑名其有關於國政者奏聞於朕我君臣期共懋勉以恭迓

天庥可也

聞高鑛近甚怠惰諸事不理詞訟皆批發該州未知確否細加體訪奏聞

同日又

奏為奏明事竊臣受

恩深重惟有實心報

主凡蒙

聖諭凜奉恪遵但識見愚陋常多未能領畧是以所具

章奏雖意出真誠而敷陳不達文情口氣實非學

年羹堯而與之相仿也臣與年羹堯於康熙六十

年在順德途中始相認識以後通問歲不過一二

次自蒙

恩旨臣遂與年羹堯相絕並無字蹟往復雖年羹堯恨

臣日深然臣既知年羹堯不純若仍與來往則臣

心亦有不純矣矧蒙

皇上知遇之隆更何求於年羹堯而尚敢依回以蹈欺
天之大罪也謹陳愚悃伏祈

睿鑒謹

奏

據奏與年羹堯通問歲不過一二次是何言歟西安總

督官廳內未有隔五日不見直督李維鈞之介使此衆目昭彰之事何可強辯觀爾今日猶左遮右拚則從前改悔之說盡屬虛詞人非聖賢孰能無過果能奮然易轍不少依回則可謂勇於自新者若仍如此巧言粉飾暗留地步以狡獪為得計以隱蔽為深謀恐一旦發覺則有心之罪無辭可遁也如欲盡釋朕疑須挺身與年羹堯作對盡情攻訐暴其奸蹟與天下人知使年羹堯恨爾如讐則不辯自明矣此又在爾之樂為與否設與

年羹堯通同相約做成假象以圖眩惑耳目斷不能逃
朕之鑒察也爾其思之

雍正三年五月初十日直隸總督臣李維鈞謹

奏為密陳實情事竊臣受我

皇上重恩內外臣工莫可企及報効微忱雖赴湯蹈火
亦所不懼豈以朋友私情而反有所顧惜依回實
緣秦中情事未知確切不敢以虛泛之語冒昧劾
今就臣所知聞者繕就叅本已於初十日拜發

伏祈

皇上恕臣從前愚昧俾臣得盡心料理地方為

聖世無虧之人臣不勝榮幸歡洽之至謹

奏

汝不盡心力亦不過如年羹堯棄之不用而已朕歷觀四十餘年內外臣工中出類拔萃堪為柱石之材者良不易得即以年羹堯而論初何嘗不以人材目之今一旦敗露至於如此川陝之遺害無窮兵民之怨恨切骨

較之蘇克濟李樹德常爾滿丕等不啻倍徙國家亦安
用此輩為哉汝祇為一身利害計則可若言經朕躬信
用倚任之人即當為無虧之全臣堯時尚有四凶斯豈
朕所能耶但不為奸徒之愚惑或可勉強一二耳大抵
人之有過如身之有疾以痛改為藥惟須真切方收實
効若以機械變詐為良醫恐疾愈深而害愈大也慎之
慎之叅本到時朕覽訖自洞徹汝之肺腑也

雍正三年五月十四日直隸總督臣李維鈞謹

奏為恭報約計二麥收成數事竊查今歲

畿北地方二麥頗稱暢茂而

畿南各府自入夏以來雨澤稀少收成不無減薄茲
據各府道并直隸五州將二麥約收分數陸續呈
報前來查順天府屬收成約有十分至六分不等
永平府屬收成約有九分至六分不等保定府屬
收成約有十分至五六分不等河間府屬收成約
有九分至五六分不等正定府屬并直隸五州所

屬收成內窪地約有九分至五六分不等高地約
有七分至三四分不等順德府屬收成內窪地約
有八分至六分不等高地約有六分五分不等廣
平府屬收成內窪地約有六分五分不等高地約
有五分至三分不等大名府屬收成內窪地約有
五六分不等高地約有三四分不等宣化府屬收
成約有九分至七分不等所有各屬報到二麥收
成約計分數臣謹具摺陳明謹

奏

所奏麥收分數不實大有損有餘補不足潤色豐年情
景

雍正三年五月十七日直隸總督臣李維鈞謹

奏為遵

旨秉公回奏事竊臣蒙

皇上發交密摺令臣秉公回奏臣遵將薊州知州李英

劣蹟逐一密加細訪雖非盡無因然或屬全虛或

屬已甚如李英果係貪劣害民斷不敢因從前曾經保薦有所徇隱今查李英雖於職守不無瑕疵而猶與百姓相安且地當孔道應付差使頗能料理無誤倘蒙

聖恩寬容臣當再行嚴飭限以三月奮勵自新觀其後效若仍因循臣即據實指叅可否如是伏祈

皇上批示遵行謹

奏

此人斷然不可姑留近又聞伊行賄於蕭永藻松阿延銀各一千兩為更換交糧斗斛兵丁甚怨且此事看守陵寢之大人正在游移未定爾若不能得其實蹟朕即降旨提拏發部究審也

雍正三年五月二十二日直隸總督臣李維鈞謹奏為奏

聞事竊據霸昌道卞之銰昌平州知州梁永佑等呈稱領兵駐防阿爾泰將軍木克登行文知照二十四

日起程於二十三日先有伊哈二姓到沙河勒索
不遂打搶草束木克登到時仍不約束一任衆兵
搶草既搶之後又照正數折價二十五日不宿正
站副都統花姓駐宿昌平之舊縣打搶草束折取
重價甚於沙河再於二十三日搶草拏獲富倫布
等共四人問明搶草是實當有隨營兵部石姓等
三人勸放不允隨稟知木克登反云擅拏伊人叫
隨營兵部審取管草老人口供勒將口供改為買

草被拏要老人李國正甘結而去等情所有木克
登領兵經過地方騷擾不堪臣謹具摺密奏伏祈
睿鑒謹

奏

此奏直陳無隱殊屬可嘉紀律不嚴何以主兵已交部
嚴察議奏矣

雍正三年六月初一日直隸總督臣李維鈞謹
奏為謹抒下情仰祈

睿鑒事竊臣與年羹堯向屬交好蒙

皇上硃批令臣漸漸遠之臣恪遵

諭旨遂與疏遠惟於歲杪趙宏燮繼子由保定赴西安

臣順寄一書亦候問常語自今年正月以至於今

實無一字一人來往臣內問諸心斷不敢自負欺

凡辯者辯已之無過也既自謂無過安望其能改總之

天之罪也輟轉思維祇有臣之胞姪李宗渭在年羹堯

爾若不使年羹堯痛恨朕疑斷不能解陸續奏朕心

處効力隨班行走一月數次諒必有人見臣姪在

釋然時自有明諭何庸喋喋巧辭為耶

年羹堯之門形跡疑似臣之不與年羹堯往來誠

難取信或指臣姪暗中來往亦未可定今幸蒙

任彼自趨死路

皇上開恩已不罪臣然臣猶日夜悚惕況年羹堯雖經

何能逃朕之範圍

離任而舊日從事之人未必盡斷其門即臣姪亦

如此則不肖子也

未能獨遠臣於正月內欲叫臣姪來保曾經面

奏蒙

叫回形迹雖泯朕疑究不能釋正欲令伊隨之

聖諭不必是以未即叫回今欲叫回以絕形跡之疑似

謹披誠瀆

奏伏祈

皇上睿鑒謹

奏

目下之不罪汝者因汝前日之叅奏也但年羹堯在保之事豈此一叅之所能盡而汝之所聞所見又豈止此數事而已不加罪之旨汝雖數次摺奏朕未曾批示一字正看汝將來之續叅如何今年羹堯痛恨以釋朕杯中蛇影也朕既經屢頒諭旨豈肯食言在汝等自為之耳若不必然以汝輩投畀有北將見朝野肅清矣今將

年羹堯之非人口所出之奏摺發來汝看殊為可笑可愧之極

雍正三年六月初六日直隸總督臣李維鈞謹

奏為續報雨澤事竊臣據各屬陸續呈報除得微雨

者不敢繁敘外查五月二十一日龍門縣萬全縣

各得雨五寸二十四日遷安縣得雨霑足香河縣

得雨五寸餘梁城所得雨五寸薊州得雨三寸東

光縣得雨一寸二十六日盧龍縣得雨五寸遵化

州豐潤縣各得雨四寸三河縣得雨二寸肥鄉縣
永年縣邯鄲縣各得雨一寸二十七日曲陽縣得
雨二寸六月初二日東光縣得雨七寸武邑縣內
邱縣各得雨三寸隆平縣唐山縣各得雨二寸初
二初三兩日南宮縣得雨四寸良鄉縣得雨一寸
餘衡水縣得雨霑足寧津縣得雨六寸吳橋縣得
雨五寸冀州秦強縣各得雨三寸初四日易州得
雨二寸正在繕摺間保定府城於初六日自丑時

起至辰時甘霖大沛四野霑足秋禾暢茂農民歡
頌除俟別屬報到另行彙

奏外所有各屬續報雨澤緣由理合繕摺陳明謹
奏

此後不必報雨目今大雨時行之際但慮太過耳

雍正三年六月二十六日直隸總督臣李維鈞謹
奏為敬陳管見仰祈

睿鑒事竊查河南漕運每因衛河淺阻到運遲緩以致

上厪

宸衷伏閱卽抄特蒙

聖諭令直隸大名府屬之濬縣滑縣內黃縣改隸河南
之衛輝彰德二府俾河南運道得專責成法至善
也第臣遠稽往制近按衛河若河南糧艘免運仍
循舊次似屬利便臣謹為我

皇上陳之查河南兌糧水次自元明以至

本朝俱在直隸大名府元城縣之小灘鎮糧船受兌

開行由小灘鎮歷元城之善樂營而入臨清運河
河身寬深從無淤沙淺澁之阻其路近易行糧運
無悞也自康熙三十五年間豫撫臣李國亮

題請改次衛輝相沿至今查在衛輝受兌開行至直
屬之濬縣經歷淇河噴沙老鶴嘴石崗石柱險阻
又中錯湯陰縣河道皆係流沙聚散不定建壩則
無地築樁堅固難保修閘則水性下刷蓄洩無資
每年漕船行至濬縣內黃縣地方募夫挑挖僱船

剝運官民交困糧艘難行二十五年矣夫河南
漕米二十五萬石在直屬採買居多且由衛輝而
入濬滑等縣以至山東臨清州路有六百餘里方
入運河其間築壩築閘挖淺剝運費盡人力而糧
艘不得速行莫若仍復小灘為兌次直抵臨清州
路僅二百一十餘里河水深寬無阻其路之難易
遠近判然易決若慮小灘非河南所轄民或抗違
臨兌次時兩省各委道府一員同駐小灘協恭辦

理永著為例則河南無呼應不靈之虞矣臣因漕

運重大不敢以隔省岐視曾移商河南撫臣田文

鏡未准咨覆臣仰體

聖懷敬抒管見是否可採伏祈

睿裁謹

奏

小灘開兌之說先經詳議因有難行不便之處所以中止若將此摺交發豫撫再議諒必仍執前議不移與事

無益今既將濟滑內黃等三縣歸併豫省明歲免漕時自有分曉也

雍正三年六月二十七日直隸總督臣李維鈞謹奏為奏覆事竊臣姪李宗渭原非奉

旨發往亦非部內揀發係臣姪自願捐駝効力在陝三年終不議敘

題咨今西海業蒙

廟謨神算悉已蕩平似無効力之處應否仍遣其赴陝

既非

由部揀發去留任爾斟酌

抑軍前無可効力任其去留臣未敢擅便伏祈
皇上睿鑒批示遵行再年羹堯惡蹟臣已三疏具奏然

其貪婪之處實有未盡如趙之垣自願進銀三十
萬兩發與年羹堯催完僅繳二十萬兩年羹堯代
為請豁西安人見趙之垣送年羹堯禮物每次必
用皮箱數十隻不知為何物此時趙之垣雖悔亦
無及矣謹

奏

此事豈難分曉趙之垣如能知悔則轉禍為福矣更有可笑可惡處將來發露自當曉然明白也

雍正三年七月初六日直隸總督臣李維鈞謹
奏為奏

聞事竊永定河南岸第五工鹹廠大堤於本年六月二十五日被水漫開經臣一面

奏明一面飛委理事同知噶布喇前往協幫堵築在案今又據分司蘇敏呈報六月二十六日大雨傾

盆晝夜不止河水較前更漲南岸第一工玉皇廟
沙堤坍卸一百餘丈北岸第一工朱家營沙堤坍
卸四十餘丈幸未成患南岸第五工黃家灣大堤
漫開二十餘丈等情前來臣隨委布政司羅密前
往查明坍卸丈尺確數及有無淹損田禾村舍到
日另行摺

奏仍委理事同知噶布喇協幫分司同知將兩處漫
堤勒限作速堵築堅固具報外所有堤工被水漫

開緣由臣謹具摺陳明謹

奏

水患豈無故而生理應如是乃朕意內之事也

雍正三年七月十三日直隸總督臣李維鈞謹

奏為奏

聞事竊武清大城東安文安薊州玉田六州縣被水並
固安永清二縣因永定河南岸第五工大堤漫開
田禾被淹各緣由經臣先後

奏明在案今據霸昌道卞之銓呈據霸州知州遂選
申報本年六月初六至二十九等日陰雨連綿以
致永定琉璃高陽玉帶等河泛漲平地水深七八
尺三四尺不等田禾淹沒房舍坍塌等情又據河
間府屬之任邱縣知縣袁圻申報六月二十九日
高陽縣螭螂口之南冠家墳廢堤漫開任邑地接
下流尚書等村莊淹沒田禾等情又據通永道高
鑛呈據寶坻縣知縣吳祖留申報六月二十五等

日大雨滂沱民堤被衝田禾淹沒并梁城所亦因
陰雨連綿田禾被淹等情各報前來臣隨即分飭
布政司委員前往會同該地方官將被水村莊輕
重情形細查確實并令加意撫恤其被漫處所飭
令該州縣上緊堵築完固外合將被水緣由具摺

陳明謹

奏

從來乖氣致異朕固知畿內今歲必至於如是也

天道不爽殊可凜懼

同日又

奏為奉

旨發審人犯事竊薊州民馮兆隆等四百餘人在

皇城内保留薊州知州奉

旨將為首之馮兆隆等二十五人拏送本省總督或有
受人賄囑情弊著總督審明欽此臣遵將解到人犯

發布按二司訊取確供詳解去後茲據布政司羅

密按察司浦文焯審據各犯僉供叅革知州李英
平日催徵錢糧審理詞訟不曾輕易責打愚民感
其小惠一聞叅革摘印即羣向通水道懇其轉詳
保留繼知不能轉達恐來官不及李牧復赴京城
籲留誤入

皇城干犯法紀實無受人賄囑等情律擬解審前來
臣復親加研審各供無異臣查李英居官實多踰
閑但平日頗以小惠愚人耳目故鄉民聞其摘印

即向通水道籲留實無賄囑情由因通水道不能轉達旋赴京具呈實出一時愚見惟是各犯不安分守業擅入

皇城保留不便照律止杖一百應將名列呈首之馮兆隆做呈詞之陳瑄挺身遞呈之楊建勲均杖一百折責四十板仍枷號一箇月楊建勲年老收贖其餘劉天榮等二十二名與未拏獲之衆人可否仰邀

皇仁綦從寬典分別責儆臣未敢擅便伏候

聖裁批示遵行謹

奏

高鑛既不為之轉詳即應曉諭令各散歸今反指使一起無知愚頑擅入禁城向怡親王訴懇情屬可惡此事罪在高鑛當一併附叅何可寬貸也

雍正三年七月十九日直隸總督臣李維鈞謹

奏為奏

金史卷之八
卷十下
聞事竊查直屬地方六月以來或被河水漫衍或被山水衝發報災踵至然高阜處尚屬無礙自入七月連旬大雨低窪之地一望無涯北府高地亦多有被淹者南府高阜地多窪下地少雖有淹損不足為憂皆臣奉職無狀上違

天和日夜改悔警省焦愁孔迫寢食不寧頭暈心悸計無所出臣已委幹員分往撫恤其如車馬難行咸阻中途俟稍可舉步臣即督令星馳前往協同地方

官逐一查明分頭料理其乏食窮民萬難坐視或散銀錢或給米穀先行撫恤若循例查明始行

奏請必需月日恐被水之民難免失所非所以仰體皇上愛養元元至意其被水最重地方容查覆到日臣當分行撫恤伏祈

睿鑒謹

奏

乏食災黎曷可令其枵腹一面速為賑恤一面確查明

白再行題奏

同日又

奏為奏

聞事竊保定郡城年羹堯房屋係去夏所置其貲財係

今年二月四月內從西安運來者臣同布按二司

并府廳縣各官親往嚴查逐細檢點今查出鎖子

甲二十八身密針箭頭四千根盛四箇并銀兩金

銀器皿紗緞紬疋玉器磁器銅器字畫什物等項

俱加封固又定州房屋內查出什物器皿亦皆封固臣先具摺

奏明至細數冊容各屬查覆到日一併分晰同田房數目彙造伏祈

皇上睿鑒臣思年羹堯家貲鉅富狡兔三窟今檢其物件除現銀五萬一千四百兩外其餘紗緞古董等物約值銀十萬餘兩並無貴重之物可見藏匿他處甚多也謹

奏

為年羹堯爾將來仍恐不能保全首領也

雍正三年七月二十六日直隸總督臣李維鈞謹
奏為奏

聞事竊查永定河南北兩岸及武清運河等處堤工衝
漫各緣由經臣先後

奏明在案今又據文安縣知縣楊楠申報七月初七
八等日大雨如注將縣屬清河堤工崔家房迤東

漫溢三十餘丈左家莊迤西漫溢四十餘丈等情
又據霸州知州逯選申報所屬清河堤工七月初
七日將趙哥莊以至高橋堤工間斷漫溢二百四
十餘丈等情又據東光縣知縣李文淑申報所屬
運河穆家口河堤漫溢十七丈有餘等情又據香
河縣知縣周世儀申報所屬運河秦家房之堤工
漫溢十九丈零二百戶堤工漫溢七十餘丈已經
報明

欽差監督現在分頭搶護等情各申報前來臣隨即飛飭各該州縣印河各官將漫溢堤工上緊搶護堵築堅固俟詳報到日另為摺

奏外所有四州縣申報清運兩河堤岸被漫緣由理合具摺陳明謹

奏

人事乖戾無形之感也災異譴告有形之應也有無形之感然後致有形之應斯言洵不誣矣

雍正三年七月二十九日直隸總督臣李維鈞謹
奏為奏

聞事竊今年六七兩月雨水過多北府被水州縣如霸
州文安東安大城永清固安武清薊州玉田寶坻
及裁併之梁城所與任邱等十二州縣所被水情
形臣已先後奏

聞續據呈報香河豐潤保定安州新安獻縣青縣景州
南皮東光寧津天津慶雲交河滄州鹽山靜海肅

寧及津軍廳葦漁課共一十九州縣廳以上共計
三十一州縣廳所房屋坍塌田禾淹損既難餬口
更虞流離蒙

皇上軫恤民瘼

特諭速行賑濟臣欽遵即飛行賑濟一月計每州縣被
水村莊之多寡確查實係貧民按口給食每日大
口給米三合小口給米二合俟此一月賑完查明
戶口確數臣再

題請續賑外再三十一州縣廳所錢糧伏祈

皇上特頒

諭旨緩至雍正四年麥收後徵輸則

皇仁浩蕩尤永被無疆矣謹

奏

朕憫惻畿內黎庶被災已特諭賑恤矣至於題請緩徵
乃汝職分中事有成例可循所請倘與例不符自有一
定處分朕何所據而特頒緩徵諭旨耶

雍正三年八月初四日直隸總督臣李維鈞謹

奏為懇乞

聖恩慈覆矜全事竊臣查年羹堯貲財具摺奏

聞恭奉

硃批臣跪讀之下魂魄俱喪情極呼

天惟有懇求

怙冒伏念臣重以多愆負罪滋甚仰蒙

覆載屢

賜寬容如年羹堯奸逆狂悖臣民共憤臣始不察交之於前絕之不早既深愧恨幸蒙

聖明矜察俾臣知所改悔得以奮志自新嗣將年羹堯罪狀屢叅實以年羹堯負

恩背義禽獸奚擇臣非特與之世結深讐并不欲與之並生

聖世何敢少懷怠志上干

天罰臣同布按二司摻查年羹堯貲財何敢少存私意

況耳目昭然更何能掩飾其私藏軍器盔甲箭頭
不臣不法臣雖特疏叅効第恐尚有隱匿現在將
年羹堯家人魏之輝嚴三等臣同布按二司嚴究
貲財下落俟審明有無寄匿另摺奏

聞臣無任感愧恐懼之至謹

奏

朕本心原欲開一面之網保全爾之身命無如爾自執
迷朕亦末如之何矣總之年羹堯乃爾之禍媒也朕特

許十二人中不意有爾等負恩三人矣殊覺赧顏朕惟
愧少識人之明耳夫復何尤



硃批諭旨卷十下